

(三) 历修谱序

1、士龙公房

向氏家谱旧叙

洪武四年春，余来莅平。有明经向君祥仲者，来谒余。观其语默进止，居然诚笃君子也，因以国士待之，与订交焉。方是时，君辑家乘，丐给执照，且嘱余序。曰：“吾自先人来此土，垂百年，率不显，余恐先绪之日就芜没也。”言之貌若甚戚者，乃谨询其世系暨所以来居是邦，乃知自南宋间始矣。向氏本殷后，为宋公族，世居河南。其在晋则有若子期之清悟，与稽、阮齐名。其在南北时，则有若元李（注：应为玄季。向柳，字玄季，晋代河内山阳人。）之志行方洁，不趋势利，是皆清风绝俗，克成其浩然不可一世之志，不拘拘以仕进荣。迨至炎宋真宗时，敏中公始以进士擢为左仆射，谥文简。上常器其深閤沉毅，以飞白书其名嘉之。神宗时，立其嫡孙经之女为后。哲宗立，又尊为钦圣宪肃皇太后。是时向氏族最贵显，朱紫满门，而椒衍瓜绵，别为世系。有曰：“传系宗子许，士公之大

元，有能成此道，可以为世本”云云。今祥仲、振仲公乃派别得十代孙也。先是由传远而生系鸾、系凤，由系鸾而生宗麒、宗麟，由宗麒而生子大、子敬，由子大（注：脱“子敬”两字。许昌公之父为子大公，许虔公之父乃子敬公。）生许昌、许虔，许昌生士璧，许虔生衡、龙、雄、渊。方南北争攘，戈兵不宁，荡析离逃者半天下。而士璧适以钦命潭州为节度使，其弟衡、龙、雄、渊由洪州官署亦随居节度幕府焉。至士璧被谗罢职，其弟昆思伏隐山林，择平邑之西乡而迁之。后，衡又迁石轧头，龙迁张古塘，雄迁湖源，渊迁湘阴南陂。爰是韬光敛迹，永别故居。抱琐尾之伤，兼忆曩昔之盛。此向君之所为盡（音xì，悲伤之意）然也。抑吾有为向氏慰者：其在《易》曰“无平不陂，无往不复”，此其固然。今虽不幸郁郁于兹，吾乌知前此之显荣赫奕者，不自敛晦中来乎？况其清风绝俗，固犹大有人在也，向君勉为基仁蕙义，以俟夫将来而可。是为序。

明洪武四年夏六月

知平江县事交河刘顺撰

家谱旧序

大凡谱作于增修之后易，作于独创之时难；作于聚族而处之地易，作于播迁靡定之日难。吾家肇造河南，显名炎宋。开国之初，族法未立，至眉山苏氏始著族谱，作者宗之。如吾族虽以元勋国戚赐谥加封，当其时固犹未有谱也。迨自行派演而后始列世系。自文简公以下，袭爵通侯，几逾五代，递传至福，虽有旧谱，经变革兵燹之后，固有即于销亡者。况自燕国公以洪州守卒于官，即流寓洪州之洗马市。至高祖伯伍郎昆仲扶櫟南来，始迁平邑之梓江，寻，复析处金坪、古塘、西山、南陂之间。虽相距不过数十里许，而于播迁初定之候，旧乘已无存矣。虽曾祖松轩公撰有基础簿记，止叙迁徙之由，并田庐、邱墓之所，其于宗法，固犹未详也。予小子以抱残守缺之身，兼值避乱图存之后，虽欲独出手笔，撰成家谱，不其难哉！然而及此不谱，乃欲以其难者诿诸后人，吾知文献无征，世系莫考，必更有其难焉者矣。福用是不揣固陋，自河内肇封以来，追叙源流，穷其支派，且即我先人之卜吉于平者，详其始末，缮成四帙，颁给官印，兼付

执照，以授后嗣，俾生其后者有所据焉可也！至由是而叙彝伦、联族姓、笃恩义，因之绍承先烈，毋（注：疑“毋”为衍字，或为“以”字）用迪前人光。则于今日之撰而序之者，犹不无后望云。

大明洪武四年某月某日
十世裔孙廩贡生元福仲祥氏撰

谱序（初修朝彬公）

稽我族以宋世河南宦籍改隶湖湘，自崇祀潭州安抚士璧公外别无家庙，元福、元礼、元禄、元德公谱外无刻本。生其后者，欲延血食以肃宗祊，沿旧牒而订家乘，其能已哉。

乾隆甲辰春，我族合展始祖许虔公墓旁，有合修祠谱之议。予曰：“我前人所欲举而未果者，今乃有此议也。吾虽老矣，尚其共勦乃事，一决所议焉，可也。”但议定而于建祠之所，有主县城者，又有主伍市者，予与众告曰：“我族之附县鄙者，近则四五十里，远则几至百里，其散处长湘者，且隔百里外焉。祠庙虽隆，往返奔驰，恐后来与祭者亦寥寥矣。盍于县城裁置公所，祠则于伍市便。”众曰：“诺。”遥是度形势、购基址、择吉日，鸠工选材，创祠于伍公市街道东偏。越一岁丁未，祠落成，蠲吉奉主入祠祀之，祭毕，踵议谱事，予曰：“祠之作，有财用者可董成之，能以人力与也。谱之作，但据旧本，不无残缺，罔所依据，此难以人力与也。”众曰：“请宗苏式，谱近而不谱远，可乎？”于是自宋敏中公五代以下，叙我衡、龙、雄、渊四大公为始迁平邑之嫡祖，为之详世系、别同异，稽其迁徙、卒葬至叙列世次，兼仿欧式，五代转提，以便查阅。

越二岁己酉，而谱亦成，众曰：“公于此可以序之乎？”予曰：“祠谱之源流，当路之弁言序之者详矣，予独念祠谱之作，非一人任其总理局中者，予以成弟暨鉴亭、征吉、搏万、九均、锡图、极尊诸人也。其敛捐资丁费共成厥事者，有清才、万选、德瑞、天申、士希、统四、善忠、从先、班林、西猷、龙高、希成、萃川、屏藩、宇授、兼万、元善、达俊、思孔、锦堂、成才、齐哉、以荣、圣鉴、连茹、千乘、国瑞、书圃、渭英、千钟、相望、赐才、孔思、学安、云汉、事君、高翠诸人也。其鸠工而相木取材者，佑圣也。至于校订家谱、互为编辑者，则有石溪、望湖、寿山、晓楼、松门暨侄晓庵、长男试陞、次男清伊也。其绘祠墓图式者，贵彬也。凡此皆不可没其人者也。”嗟夫！以数百年未举之事，一旦祠宇焕然，规模宏整，谱亦元元本本，较若列眉。行见血食以绵，祀典罔缺，旧乘一新，源流可考。其于敬宗收族之心，不无一得。因之移孝作忠，以黼黻皇猷，安在当日河南开封之盛专美于前也哉。此又彬所穆然思、颯然望者也。

时

乾隆五十四年己酉岁孟冬月中澣之九日

龙公十六代孙石泉朝彬文彦甫谨撰

祠谱自叙（初修朝信公）

大凡祠、谱之修，所以妥先灵、联族属也。其费浩繁，其事久远，司其局者必老成持重，大公无我，核实而不循名，然后为族人之所亲信，可以胜任愉快也。如我向氏自炎宋景定年间，以河南宦籍改隶湖湘，迨至圣朝，孙子亦号繁昌，迩来祠、谱两事，言修者众，未获成功。即我龙公房与我同志者一倡议于辛卯春，再定议于丁酉秋，皆始合终散。诚以此固非一身一家之为计，一朝一夕可为功也。顾议已起，而事未行，终觉介然于怀，盖以是踌躇满志者数年。

今幸祠、谱先后兴工，其中始末，诸公传序言之详矣，予复何赘。第思我以衰老久病之躯，恐一疾不起，亦曾托文彦兄并总理诸公，转嘱七弟希成，善始善终，以相翼赞。庶几此举，我昆季不为无功，即不敢自为表扬，亦不至苦心之终灭。况乎妥先灵、联族属，原系吾人之职事，吾尽吾心，吾竭吾力。诸族众必有能辨之者。

时

乾隆五十四年己酉岁

龙公十六世孙朝信以成氏撰。

祠谱自叙（初修贤诏公）

恭逢圣天子以仁孝治天下，化民成俗，中外同风，服先畴、食旧德者，固人人有敦本务实之思。乾隆辛卯春，诏先君子与我龙公房原有肇修祠谱之议，始开丁册，尚以数限经费不敷。丁酉秋，复定议捐资置产纳息，以备经费，以旧主夺置事寝。怊然于中，迁延未遂。

乾隆甲辰岁，为展始祖许虔公墓，得与诸族众会商及此事，一时各言夙志，翕然从同，即凡童稚妇孺闻者，莫不踊跃欢忭，此何以故？盖以数百年欲举之事，其流示于家人、父子间者已久，故一触而感乎，人心之所不言而同然也。乙巳春，诸族长以人谋僉同而龟筮协吉，定议举行。爰卜基于伍市街道之上游，相厥形势，枕山带河，创修祠宇。尔时我房曾叔祖文彦、以成，衡公房叔鉴亭、征吉公暨锡图兄、极尊侄兄，渊公房九钧兄等总理祠局，先君子亦与其列，凡八人契领提纲，率作兴事，虽工大而费或不给，有烦诸首士、房长，任劳任怨之功者居多，而其事要不难成也。

越明年丙午冬，祠落成，奉宋文简公为始祖，奉衡、龙、雄、渊四大公为始迁平邑之嫡祖，蠲吉迎神主入祠祀之，潭州安抚士璧公遗裔散佚，亦奉

其神主祔之，便宜行礼，合亨于公祠。观者如堵之，便宜行礼，合亨于公祠。观者如堵。

诏独念祠且告成，谱事伊始，先君子以经理局事为重，初抱微疴，忽不经意。越丁未三月而病革，召诏垂涕道曰：“祠初成，谱未竣，吾且死，吾不瞑目也，尔尚代乃后以藏厥事乎？”言迄，扶坐而逝。呜呼！先君子童年失怙，备历诸艰，恢先绪于内难外侮之余，释纷争于尔诈我虞之地，三物力敦，闲家守法，而渊衷所固结，尤在祠、谱两大端，其亦可谓敦本者矣。乃功未成而身先殒，内念缺然。诏承厥志，敢惮艰辛，特以才短学疏，第附诸公之骥尾，无伤厥考之素心。今幸祠、谱两事先后成功，妥先灵、昭世系，继继绳绳、元元本本，庶几雍睦之风永垂无既，先人有灵，应有含笑于九京者。兹为纪其始末，附诸简端，于以卜后启者之承休有自，且以志存歿之不朽云。

时

清乾隆五十四年岁在屠维作噩嘉平月中浣之九日

龙公房十九世孙贤诏丹书甫薰沐谨撰

二修赵序

国运之昌盛，基于民气之朴厚。而族师春秋所书，乡大夫月吉所考，尤人心风俗之所见端。平江向鲁斋先生，予己酉选拔同年也，为人端谨恳到，动止有法，足征向氏之家风矣。迨先后成进士，同官京师，九衢人海，车马喧阗，惟吾两人结契最深。论文讲艺之余，语及向氏支派为宋公族，世居河内，其迁于南楚则自宋宝祐时，有文简公敏中之七世孙士璧者，为潭州节度使，遂以河南宦籍改隶湘湖间，与其弟衡、龙、雄、渊卜宅于平江，于是向氏分四大支，星罗棋布，最庶且繁，予闻而心识之。

今岁奉命调任滇黔，道经梓里，适遇重修家乘，武陵上舍生向廷灿澹如六兄携谱问序于予，披阅一过，大率皆曩时所闻于鲁斋者，澹如于鲁斋为从祖，行系平江龙公一支，乾隆时迁武陵，为人亦端谨而好善，且如合姓缀食、统宗继别之大皆能讲明而切究之，仁人报本、君子笃亲，不当如是耶？然后叹氏族之蕃昌、风俗之淳古，皆我国家酝酿涵濡之所致。予从其请而为之撮其大概，如此向氏子孙由此益加培植，将见绍潭州之令绪、衍仆射之

风，继继承承、寝昌寝炽，岂不休哉！

清道光乙酉嘉平月上浣

赐进士出身 诰授荣禄大夫 兵部尚书兼都察院
右都御史 总督云贵等处地方 提督军务兼理粮饷 前
翰林院编修 国史会典馆纂修 掌山东京畿道监察御
史 礼科刑科给事中 广东惠潮嘉兵备道 广西提刑按
察使司按察使 广东承宣布政使司布政使 兵部侍郎
兼都察院右副都御史 巡抚广西等处兼理粮饷加五
级又随带加一级纪录十二次。

赵慎畛拜撰

三修合族谱局公序

家之有谱，尤国之有史，所以征信也。周官小史之职，说者谓即后世族谱之肇端，不过奠世系、辨昭穆而已。而世之修谱者，或援势位、标名望以为光宠，于是有联宗者、认族者，甚至改姓易氏而不以为嫌，是自忘其祖，自诬其祖，奚以谱为？狄武襄，宋名臣也，有以狄梁公为言者，武襄曰：某以一时遭遇，安敢妄攀梁公，人服其卓见。

向氏之由来久矣，自春秋以后逮于汉、晋、唐各代，代有名贤著于史册，而尤独显于赵宋。时吾族自宋末迁平江之梓江，历元明以来，子姓渐蕃，分隶长湘诸邑。国朝乾隆甲辰，始建祠于伍市，踵修族谱，托始于宋相文简公，非苟然也，谱近不谱远，法本眉山苏氏，由迁平始祖上溯文简公，相距六代，其派系可按也，其邱墓可考也，其游宦迁徙之迹历历可证也，搜讨遗编，网罗放佚，虽未能一一确为证据，固可得十之七八，自异于籍谈之数典、熊生之哭墓，致等于无稽也。据其可信者传

之，其未遽信者阙以俟之，前人创始，岂不斟酌于至当哉！踵是而修者，则道光乙酉岁也，或间有考订，间有增损，而其大致悉本旧规，不外乎一脉相承，无致乱宗之意而已。

咸丰壬子，因粤寇之乱，蔓延湖湘各境，族人原重修旧牒，以笃宗盟，缘族愈众、事愈繁、费愈广，屡议屡散，甲寅冬至祀祖之期，族众大会其议，始合公举总理某某，协力某某，司局某某，丁费则房长经理之，然后归入总理。其初稿亦房长编定之，然后归入司局。盖分面任之，则事有专属，而无疏脱错误之虞，合而考之，则体归一致而无参差错出之弊，以敬宗、以收族。生逢隆盛，宅尔宅、田尔田，安土而各为其生也，即偶遭兵燹，亲其亲、长其长，亦聚族而不至于散也。守前规而勿越，庶垂后世于无穷。始于乙卯三月，竣于丁巳八月，盖其慎也。

窃为吾祖自宋末迁平，亦惟是避难图存，冀保宗祧耳。迄今沿而溯之，历世数十，历年数百，绵绵延延，引而勿替，合长湘诸邑，子孙不啻千亿焉。每值祭期，远近咸集，骏奔走，执豆筯，昭与

昭齿，穆与穆齿，肃肃以敬，雍雍以和，俨然家人父子之处一堂也。由是而推焉，则一脉之相承，可以保世之大者，岂有涯乎？但愿吾族人，无失先人典则，以为子孙模范，则今日之谱，又为异日之承籍焉，缙承而光大之者，正有赖于后来之贤肖也矣。是为序。

清咸丰七年岁次丁巳秋八月谷旦

合族谱局公撰

四修张序

家之有乘，犹国之有史也。国无史，则孰知兴衰治乱之由；家无乘，则孰知世系源流之辨。斯二者，大小有殊，而其为不可无则一也。

夫建宗祠、置祀田、荐馨香，以隆孝享，其于木本水源之义，可谓厚矣！然派别支分而谱牒不修，亦于敬宗收族之道有歉也。范文正公尝曰：

“吾吴中宗族甚多，于吾固有亲疏，然以祖宗视之，均是子孙，固无亲疏也。”欧、苏两家之各有谱式也，亦非徒以纪蕃衍、志阀阅已也。上以明祖宗之根源，下以叙子孙之支派，使昭穆不失其伦，而油然而生其孝悌之心，以共敦一本之谊耳。

河内向氏，古罗望族也。自乾隆至道光以迄咸丰，家乘已三修矣。癸未秋，余乞假南旋，聘其族兰浦课读，适以续修家乘辞，并携其旧帙以示予，且求为文以叙之。披阅一过，始知向氏族谱原原本本，禀承甚远，查核甚明，上下千百年，宛如符节不爽。夫世之为谱者，大都攀援仕宦，附会名贤，曰吾祖即某卿之分派，某相之箕裘，是欲引为谱牒光，而先灵且含羞于泉壤矣。若向氏者，肇于春秋，绵于汉晋，盛于汴宋，将相勋猷，昭垂史册。

洎于昭代，文则崇祀乡贤，武则崇祀忠义。潜德幽光，久而益发，而谱牒愈见其浩繁，即愈见其彪炳。

呜呼！莫为之前虽美弗彰，莫为之后虽盛弗传。今向氏族谱辑修于前者三，兹复起而修之，是于木本水源之义，不徒以黍稷馨香展孝思也，又能推祖宗一脉之意以联属其子姓。是以上而祖宗之根源井然而不淆也，下而子孙之支派秩然而有序也，所以兴起其孝悌之良而笃亲亲之谊者，皆与前贤之意合焉。且能仰副圣朝仁孝治世之心，行见诞敷前烈、光大门闾，必尤盛也，故乐为叙之。

钦赐策勇巴图鲁 布政使銜 前福建甘肃按察使司按察使 现总办江西督销盐务

世愚弟张岳龄顿首拜撰
时在

光绪甲申兰秋月上澣

五修彭序

余家汨罗之滨，为屈子旧游地。昔太史公适长沙，观屈原所沉渊辄叹息流涕。呜呼！忠孝之感人深矣。沿汨而上，有伍公市向氏宗祠在焉。平之人向，号称望族，其蔓而籍于长邑暨罗湘者，与吾彭氏世多姻好也。余少读书，乡校尝从学博向蔚青先生游。

岁壬子，尹平江，益得识其族之贤士大夫。癸丑春，丁外艰归里，其来年五月，明经向兰浦前辈赉书于余曰：“吾向氏自赵宋以来家于平江者，历数百年，予惧子姓之蕃而无与繁也，彝伦之歆而无与叙也，先世之泽之及吾身而斩也，将续修家乘，丐子文焉以序其端。”

余惟仁孝者，政教之始而风化之源也。周官小史掌邦国之志，奠世系以观族姓源流。魏晋以降，转相传述，至眉山苏氏、庐陵欧阳氏演为家乘，后之言谱学者靡然宗之，盖皆以笃亲亲之义而立爱敬之本也。

向之先出宋桓公，世有合德。赵宋时，文简公敏中以重德入相，勋业灿然，于淳化、天禧间其孙定国公，复以椒房之亲，位列通侯，珥貂簪绂之望，焜耀有宋者，盖五、六世。逮乎丧乱，衡龙昆

仲犹能于荡析播迁之日，抱贞养晦，迄今闻其流风，睹其遗迹，靡不低徊而兴慕。今向氏之谱其族也，殆于此加之意乎？此苏子所谓观吾谱者，孝悌之心可以油然而生也。

诗曰：“孝子不匮，永锡尔类。”礼曰：“立爱自亲始。”王子曰：“礼始于亲亲。”生乎湘累歌哭之乡，际乎沧海横流之日，陈其世德以诏后昆，维其伦纪以励末俗。吾于向氏谱有深冀焉，后之览者，将亦有感于斯言。

中华民国三年甲寅前任平江知事

湘阴彭斟雉撰

六修陈序

谱之为义大矣哉！所以序昭穆、别尊卑、笃人伦而美风俗者也。夷考厥源，由来旧矣。周礼小史奠世系，谱始昉焉。秦火既燔，典籍残缺，官失其职，氏族以淆。汉儒辈兴，国姓迄无定论，遑问编民。曹魏九品中正法行，有司选举，概稽簿状，江左诸朝因之，士族承风竞治谱学，浮夸依附务以门第相高，屏弃单寒，禁为婚媾。书佚久矣，其目散见于《世说新语》，注者犹三十有奇，要皆文家尚贤之言旨，无当于收族也。厥后宋欧、苏二氏本质家亲亲之道，阙疑纪实，缘情度义，各详其宗，日远而莫能或外，由是而国、而天下，用刑礼俗正不徒，维系固结保世滋大已也。

呜呼盛哉！向氏为中州右族，自太尉文简公仕宋真宗朝，为时名相，淳谨温良，荣施奕叶。暨乎南渡，其五世孙许虔公守洪州，卒于官，有子四人，相率负枢徙处吾平至今七百年，家乘之修且六届矣。甲辰冬月，至友子崐将其族人君子之意问叙于余，维世系之播越之由，按诸宋史以核，旧叙信而足征，兹编式仿眉山而断自许虔公，别录先世，勿诬勿漏，隐寓宗法，若协昆山归氏之义。体例精

慎，视乎妄攀巧合、忘本乱流、嘐嘐然玄众取宠者之用心，区以别矣。抑余尤有进焉，王船山有言：

“中原丧乱，山谷村堡之间，故族完聚，礼乐文章尚可求访。”吾平屏蔽湘东，壤连赣鄂，兵戈骚屑，何代无之，巨室故家，日就崩析，向氏占籍为久，独能以息以蕃，以享其田园，以守其邱墓，而无离散争陵之事，意必有暗然高隐修身于家、成教于族者。往在逊朝，巍科相继，岁时祭祀，号为知礼。今之秀者，群兴于学，以薪畚发于事功，朴者力田服贾，鲜有侈怠，信其族盛而多贤，船山之言为不虚也。

当许虔公之子士衡宾旅于此，意谓避乱图存，以妥先灵耳，庸詎知其后之昌如是耶？国削身危，今不异昔，子昆甯伏岩阿，乃能偕其父老兄弟，兢兢焉以收族为志，上恢前烈，下保无疆之休，览兹谱者，岂惟睪然兴世德之思，运会推移，亦将于是乎！验用忘謏陋，谨为叙以贻之。

湖南高等法院院长陈长簇顿首拜撰

向氏族谱序（七修良宏公）

《向氏族谱》，自许虔公于宋理宗景定年间（公元1260年许）枢徙平江至今，垂七百三十余年，已修谱六届。初修，清乾隆五十四年己酉；二修，清嘉庆五年乙卯；三修，清咸丰七年丁巳；四修，清光绪十年甲申；五修，民国三年甲寅；六修，民国三十三年甲申。按例三十年一修。然世事沧桑，星移物换，六修至今，时逾半个世纪，谱牒毁损散失几尽，若不抢修，行将湮没。族人有志于此者，不乏其人。然终因工程艰巨，经济匮乏而罢。1992年春，渊公房石储等人首先倡修支谱，并四处调研，终于在前三联乡坎头村找到向桃仁妥为保存之三、四、五、六修家谱，为搞好七修创造有利条件。1993年，该房支谱率先完成。1994年8月，衡公房爱保、昆纯、祖荫、辉宏、斌泉等成立“向氏七修族谱筹委会”，邀余参与，予毅然从之，此亦予之夙愿也。于是，积极联络各房族众，宣传鼓动，觅旧谱、事采访，披星戴月，沐风栉雨，踏雪冒霜，前往浏阳、长沙、望城、汨罗、岳阳、临湘、三市、栗山等地，寻根溯源。力争迅达，不敢惮烦，曾走访参与六修之老前辈顾明、青松、雨初

等君求教，受益殊深。所至之处，族人皆额手称赞，踊跃相从，连算命瞽叟新建，七旬老妪缪某干娘等，均闻讯慷慨解囊相助。能文公播迁托田之一支，感慨系之曰：“吾房迁居托田时达百年之久，近五十余载，今族人光临议修谱事，真吾族幸事”；士寿公一支近千人，定居竹山塆，自清宣统元年四修后，离支（注：七修前从未合修，“离支”说恐属误传。）达百余年之久，今恭贲家乘，要求归宗，参与七修，经议佥同；士衡公房公用、公明公支千余人播迁岳阳筭口等地，昔因战乱离析，五、六修均未入谱。六修世系表注以下落不明或无后。隔绝八十余载，相遇若路人，今皆庆幸收宗。六修时，霞山先生有联云：不惮天涯万里遥，联络宗亲，关系只缘同血统；未惧风潮三载久，散离兄弟，团圆依旧返家乡。予今日始深有体会。

经查阅历修族谱，均不详敏中公祖考英名及其子孙脉络。士衡公房二十九世裔孙兴礼麓生君在京任职，从四库全书中查到敏中公之孙婿祖士衡奉敕修撰之《敏中公神道碑文》，始知敏中公之曾祖莱国公讳贻孙，祖许国公讳载烈，考曹国公讳瑀，皆赠开封府仪同三司、太师、尚书令兼中书令，而国

爵之命凡五迁焉。传正、式、亮、师、范等公，皆敏中公嫡嗣，均为宋贤臣；三女：长适金部员外郎李直方；次适如京副使王希范；三适中书皇甫泌。孙十人，长绛，大理寺丞；次绛，卫理寺丞；次绅、约、综，卫尉寺丞；次纬，大理寺丞；次纯，西头供奉官；次缓、纶、维，大理寺评事。曾孙四人，瓜瓞绵延，脉络清晰可观。因房谱已印刷发放，公祖部分，仍沿六修，未能收回更改，亦就此述明。

历时一年，谱稿初成，谨依六修模式编排，以衡、龙、雄、渊、寿五房分系，爰宗欧式，但有所鼎新。坚持计划生育之基本国策，革除重男轻女之陋习陈规。女占主格，书明生庚、学历、职业及适人姓名、住址，以示男女平等。五代转图，分世次、纪迁徙，详生、卒、葬，载以例言，编目录，分篇次，一目了然。德高望重者，登其传赞以旌之。在七修立功，捐款者，载其芳名或撰文以彰之，遥远通联不及者，着其地而待后续之，如士雄公支，经派员往长沙等地查访无果。播迁其他各地者，或通联不及，或自不介入，深感遗憾，望后续之。谱成，族人嘱予序。礼愧德薄才疏，文粗语涩，难免纰漏褻渎之尤，内心惶恐，然义不容诿，

故贸然濡笔书之，并赋小诗二首赞曰：

其一

七修今始庆蝉联，弹指驹光五十年。
梨枣编排依旧谱，箕裘克绍续新篇。
纲常丕振承先德，孝友相期励后贤。
大耐家声传万代，开来继往福绵延。

其二

自迁平邑立纲常，卅代余繁炽且昌。
氏族兴隆呈异彩，人文鼎盛灿霞光。
开封府上名声远，大耐堂中正气昂。
饮水思源怀祖泽，晨昏敬荐烈宗香。

士衡公贤梁公支三十世裔孙 原平江县法院副院长、
检察院副检察长良宏、礼初氏谨撰

公元一九九五年乙亥月上浣之九日于平城

2、士寿公房

家乘流传谱序（初修廷赞公）

夫谱牒之作，其来尚矣！古之君子，明亲疏、别贵贱，未有不以此为本也。慨自海桑变迁，乱离荐更，则向之名家大族，往往为之混淆，有起自草野，骨附簪缨之后；生长下贱，妄连光介之裔者有之。噫！谱牒不可以不明。

然吾家自始祖岳卫百户寿公至予有十一代，其间源远流长，世次井然，或文或武，颇称望族。凡昭穆之辨、支派亲疏之别与婚姻丧葬之细，莫不具载于谱。上以缙承前代之绪，下以为后世子孙之法，则可以明木本水源之义，而求无忝于厥祖矣。昔所谓哭子仪之墓者，羞之。此无他，由谱牒失传而渊源无据故也。悲夫！赞也早亲经史、壮尚儒风，犹拳拳以此为重，庶俾昭穆、秩分、尊卑有序，不以富贵而亲，不以贫贱而疏，世泽流芳，垂为永久。第居家末，年逾古稀，惟愿肖子贤孙，绳绳相继，立志千秋！经曰：立身扬名，以显父母。此之谓也。是为序。

时

大清康熙二年岁次癸卯孟秋月之望五日

十一世嗣孙向廷赞虞勳甫敬撰

序（二修达猷公）

粤自两仪奠而庶族繁，人列三才，锡姓别氏，莫不有自。然之培其本而达其支，帝升王降，运会攸殊，而林林总总，既苦于蹂躏之骁戎，复苛于镡锋之销弱。逮世教鼎兴，熙皞随运，泯帝则之识，知尧天之日月重光，禹甸之春秋顺序，空中楼阁，宇内且蕃芸矣！夫负大舟者视乎水，负大翼者视乎风，其所积然也。人生于中，所积以卜食报之，远近胥于是乎！

观焉我族，近在明朝，亦乃巴岳望系，其跨越洞庭、泓雄涇渭者，拖紫纓金，固自不乏。邈鼻祖左师公，发迹河南，历传苗裔，支分八大行，衍殷昌大其符源，各派散住各州，其丽不亿。明初万寿祖始由常德而迁岳之巴陵，永乐间，官封百户侯，传诚、信、暹、玺四祖，世袭加封岳城。玺发三行：长葵、次茂、三苍。葵生时用，官房是也。余祖茂生时新、时泰，新生少澄、少湘，澄之子孙分住巴陵、渭洞耕输，向尚操田。苍生时科、并余祖时泰暨少湘共分三支，俱由巴陵而分道扬鑣于岳之平江。时科苗裔耕住本庄向家畲。余祖时泰相传至

今住向忠操田，地名向山冲。少湘苗裔，耕住么儿操庄，地名向家巷。亦皆食旧服先，宅尔宅、以畋尔田，年逢大有，家为弦而户为诵，路步青云，彪彪炳炳，将退则储乡闾之望，进则覲邦国之光者，夫岂易量耶？从此敬宗收族，笃叙彝伦，谱牒昭然，宝垂家乘，枝虽分而无致越人之隔膜，邑虽别而有如骨肉之关情，入孝出悌，说礼敦诗，忠可移于君，顺可移于长，治可移于官，我族其永传之。

时

大清乾隆二十九年岁次甲申菊月上浣

十二世嗣孙达猷又赐氏敬撰

家乘谱序（二修彬公）

人之有祖犹木之有本、水之有源。水有源则流自长，木有本则枝自茂，此理势之必然也。况宗祖为子孙之所自出，使不溯其本、清其源，将后之人莫识所从来，则纲常不正、亲疏无序，视为路人，役以奴隶者有之，于是有谱牒以纪焉。夫谱者普也，普同族之人而使之脉络分明也；牒者叠也，叠同族之人而使之继续不绝也。是谱牒之设，大都出以仁人孝子之至意。如苏氏、欧阳氏流风至今尚在也，而后之按图而稽世系者，谓非仁孝之心所不能自己者乎。

彬聆庭训，以敦伦为首务。侍讲之余，常命缮修家乘，无何经年舌耜，日为人忙，有志未逮。岁丙子，检阅先世虫篇及曾祖简公遗笔，系出周左师，克合晋楚，封邑于向，姓始基焉。由周而汉、而晋，以及唐、宋、元、明，或为文臣：如平章正官之文简公；或为武将：如性行淑均之宠将军；或隐居竹林而大畅元风；或志行高洁而不趋势利。累世以来，闻人辈出，迄于今，虽多历年所，派别支分，而按之鉴史实录，班班可考也。

矧吾家自八大房坤祖之后，原籍常德府城隍门首剪刀巷，因万寿公同明太祖出征建功，官升岳卫，迨后解组，遂卜居城南，是吾族今日之散处岳属者，有自来也。寿生以诚，诚于永乐年间，随征广西，

大著功绩，诰封昭讨将军。诚祖生信。信生暹，官封千户。暹祖生玺，镇两广，开辰州土司建功，诰封安南将军。玺生葵、茂、苍。葵生时用，苍生时科，茂生时新、时亨、时泰。新生少澄、少溪、少湘。澄生正阳、荆阳。正阳生简公。自寿祖至公数之居岳城者，几十代。公因明末兵燹，迁居巴陵之渭洞。葵后、苍后、泰后、湘后，咸徙平江而居，即今向山冲、茅畲、茅栗岭，聚族所也。凡此数处，宗图支派，秩然不紊。至若湘阴之白果洞，平江之大头岭，源潭为湘籍属，油港为东陵版图，率皆出自左师之后。第不知分隔何代，存之以待参考。

惟我族子姓虽称繁衍，立户散处不一，岁久丹黄，深为远虑，爰遵欧阳文忠公式，盖自天子以至于庶人，壹是皆以修身为本，身修则家可教矣，而孝、悌、慈所以修身而教于家者也。则谱之为谱，所贵是在是，岂第录其字讳、行号、显晦、行实、生歿葬、年月日、转徙、宅兆而已哉？由是昭穆分、亲疏序、纲常正、派系明，前我而生者，知其所自出，而有法有戒；后我而生者，知其所从来，而有劝有惩，亦如木之有本、水之有源，流长而枝茂也夫。

皇清乾隆二十一年岁次丙子麦秋之吉

十三世嗣孙 向彬敬序

谱序（二修上贤公）

盖闻天开地辟而后人生焉，则知天地者，人之始也；父母者，人之本也。由父而祖而高、曾以及始太玄元，皆一气之所贯注，共脉之所流传，以递衍于无穷者也。上以承宗祧，下以裕后嗣。自命氏别族以来，孰非黄炎之子孙？而亲疏有辨、远近异宜，此本始之说所以起，尊祖敬宗之义，笃亲兴仁之效，而非仅为一姓彰其体要耳。

贤生晚，罔识前言往行，因索高祖继湘、曾祖湘奇，于清明交代，离天岳城南，依住昌平茅栗岭鸦鹊冲，奇生我祖德文、瑞文、祯文、祥文，即伯叔仲季之义，虽四大房分支，各亲其亲，各长其长，何莫非始太祖万寿公之所留裔，而佑启后人者欤？贤也读古未成，历今六十有奇，每以敦本睦族为念。

乾隆辛巳，东陵族弟二迁、虔钺，毅然有大志，展孝思于不匮，盖念一脉流传，或迁徙他乡，或营情仕路，不无远近睽隔，此日远日疏，即覩面遇之，未有不目为路人。尊卑长幼之伦尚安在乎？是以不憚倭迟，再四图维，旋令各户房长，汇集丁数、庐墓、邱舍，从源溯流，寻端竟委，三载后谱

牒告成，是诚善继人之志、善述人之事者也。不谅管见，继通族诸伯叔兄弟后略为序次，庶本始之义，配诸天地上下千百世，了如指掌。谱之有关于纲纪伦常也，岂浅鲜哉！

时

乾隆二十八年岁在癸未桂月之吉
十三世嗣孙向上贤希进氏谨识

谱序（二修上理公）

尝谓天壤之大、六合之遥，均属一姓之子孙。自武王定鼎分封，因食采而命氏，则虞夏商周之胤，合八百国，而棋置星罗。所谓合一姓而统同，分众姓而各异，使任其紊淆而不为之定本，支宗派演，则异者固殊，而同者亦异。此宇内各大家靡不以集谱，可以正人伦、端风化，纲领条目，脉络分明。

矧理祖来河南河内，自太祖万寿公递传以迄于今，悠悠未艾，理也渺见寡闻，安能悉数源流，妄为序次，以遗咎于后人。窃思我祖向苍原并伯祖葵、茂，相为继起者也，三大房分支，巴、平悬隔，微论敦本睦族，未之有逮；即欲片语少叙寒暄，终以云山而修阻。理于诸叔辈，未惠德教，时族兄弟二迁、虔钱氏，本仁孝诚敬之心，发之为尊祖敬宗之举，自始太玄元、高曾祖考以及子孙曾玄，其间由合而分，由分而合，井井有条而不紊，集之为一家之谱牒，推之为一国之史书。至其定条教、彰洪规，凜凜然示人以不可犯，肖子贤孙，务宜体恤至意，幸而赓颺盛世，固奉为章程，即不幸而养晦山林，亦钦为至宝。不揣愚陋，涂鸦貂尾，序云乎哉！

时

乾隆二十八年癸未岁菊月上浣
十三世嗣孙向上理弘极氏敬序

纂修族谱序（三修宝田公）

尝闻会族纪世谓之谱，谱牒之辑原与史册并珍。昔苏明允作谱序，慨然以忽忘为戒，正恐一本之谊，间隔离歧，非亲亲长长、敦本睦族之道也。由此观之，谱之所系诚重矣！

吾族自始祖敏中公相宋发祥，绩著台鼎，维时玉佩枫宸，芬扬竹册，视三公之风度何如？实一代之衣冠在是。厥后，文祥公与宋联姻，沐圣恩诏封燕王、赐题宗派，自是家世渊源、声华藉甚。至传德公镇荆襄、迁岳郡，遂于临湘之源潭创立家室，为党里荣。递之华公生子八，支分派别，析为八大房，宦游异处，吾祖大坤公行七，袭封弥优，居止仍旧。及万寿公官辰徙岳，卜筑巴渭，散处昌江。阅数世而葵公、茂公、苍公鼎峙勿替，子姓之盛，靡不椒衍瓜绵，星罗棋布。

迄今计之，缘宋以来，家声丕振，或为文臣，或为武将，凤翔龙骧，彪炳千古。其特启鸿图而为家乘光者，本源固深且远矣。况古盛时闻人辈出，推而溯之，则有如学竞颜曾一向耕；和合晋楚一向戍；婚嫁完而游观愿遂一向子平；考校切而衰倦情倾一向朗；肃清行阵、蜀早称能一向宠；破陷城池、

金难屈节一向子韶；以及标竹林之令望、大畅元风一向秀；秉钟会之功曹、独明法教一向雍；尤有心期永久、势分胥忘一向柳。代有伟人，非可殚述。奈简册沦遗，不无散佚之虑，当日吾家诸先达深体圣天子以仁孝治天下之意，发敬宗收族之忱，纂集成帙，犹以未寿梨枣为恨。余惓怀久之，惜素拙遘，老于措大，且值兵燹，积警益重殷忧。

咸丰乙卯冬，纠族校刊，轩渠匝宇。余为局总，恒于万树号风、千山战雪之际，仿法乎苏式、欧式，辨昭穆之伦，固本根之庇，珥笔付梓，以立永垂不朽之规，非敢云全收剽费，善继其志，善述其事也。不过则而象之，恢而扩之，迪前光而裕后昆耳。语云三十年为一世，但愿在后之人克笃前烈，笔摇五岳，辉腾金马之门；檄下百城，功奏火牛之垒。绳绳继继，揆藻摘华，历三十年而一重新之，俾斯谱之垂焜耀奕叶，不啻屈平词赋之悬日月也，则吾之渊微庶有以长慰焉尔，爰不揣鄙俚而乐为之序。

咸丰五年乙卯嘉平

裔孙邑庠生玉 宝田氏谨撰

七修士寿公房序

敏中公裔孙士寿公支千余人，播迁平邑西乡之向家墩、竹山塆、向山冲、浪里龙行等地，垂七百余载，子孙繁衍，瓜瓞绵延，曾经修谱四届。第四修乃清宣统元年己酉告成，距今八十六年。尔后，隔族离支（注：“离支”说属误传。），独树一帜，令人慨叹！予等久盼合修族谱，昔因诸种原因未果。今逢盛世，物阜民安，各姓皆续修家乘。吾族衡、龙、雄、渊四大房亦发起合修族谱，吾士寿公支要求参与七修。经议皆同意。吾侪亲自参与一九九五年乙亥清明在小塘铺（河东乡太平村）爱保族人家中召开之“七修”研究会议，经衡、龙、渊、寿四大房代表讨论决定，自今始，衡、龙、雄、渊、寿五大房合修族谱，使用统一派语，以臻完善而益和谐，皆大欢喜，故乐为之短序，并赋小诗一首以致喜曰：

断谱离支八六年，收宗今日庆团圆。

七修家乘逢开放，卷首因之立片言。

士寿公支裔孙长明、青云、晃初氏敬撰

公元一九九五年岁次乙亥孟冬月之五日于向家墩